

Whakarāpopototanga rīpoata

1. I whakatūria te Kura o Marylands e te Rangapū Katorika Hōpitaria o ngā Parata o Hato Hoani o te Atua (te Rangapū) ki Ōtautahi i te tau 1955. Ko te Rangapū tētahi o ngā hapori tawhito katoa o te pāriha o te Hāhi Katorika. Ko āna mema ka oati ki te rawakoretanga, te ainga kore, te ngohetanga, e pai ai tā rātou kiri whakauka ki te kaupapa tiaki i ngā tūrora me te hunga kua tāmia e ngā pēhitanga o te pāpori. Engari ko te kura rā ia he wāhi whakatautauheha, he wāhi pāwhera tamariki me te hunga rangatahi, he wāhi tūkinō i ō rātou taha tinana, taha wairua nō rātou ka noho i raro i te taurimatanga o ngā parata. I tīmata ngā mahi a te Tarati o Hebron i te tau 1986, i whakahaerehia e te Rangapū. Nā wai rā ka huri hei wāhi i pāwheratia ai, i tūkinotia ai ngā rangatahi i te ringa o tētahi o ngā parata o te Rangapū. E ai ki ngā purapura ora he wāhi ēnei e whakakōtongatia ai te tangata, ānō nei "he moepapa kua tinana mai".

2. I taua wā tae atu ki ngā tau 1980 i whakatauria e ngā kāwanatanga kia whakaurua ngā tamariki me te hunga rangatahi hauā ki ēnei kura motuhake e pai ai te whakangungua o rātou, kia kua hoki rātou e noho ki te kāinga ki reira kuraina tahi ai me ētahi atu tamariki. Ko ngā tamariki me ngā rangatahi i whakanohoa ki raro i te taurimatanga o te Kura o Marylands (mai i te 6 pakeke) me te Tarati o Hebron (i te nuinga o te wā he taiohi, engari ko ētahi he 8 tau noa iho te pakeke), ko rātou ngā mea whakaraerae o te hapori. He nui ngā tama hauā i whakaurua ki Marylands, ā, ko ērā i noho i raro i te taurimatanga o Te Tarati o Hebron, ko te nuinga he tamaiti ka nōhia poka noa i ngā tiriti. He nui ngā rangatahi Māori, e matea ana ki te noho haumarū, ki te noho marumarū, kia tautokona hoki rātou.

3. I te nuinga o te wā, i tukuna ngā tama ki Marylands i runga i te whakaponō koirā te wāhi pai mō rātou, koirā hoki te wāhi e whakatutukia ai ō rātou matea-ā-ako e ngā parata o Hato Hoani o te Atua, i raro i ngā tauwhirotaanga a te Hāhi Katorika o te Atua. Heoi anō, i tūkinotia, i whakahapatia kinotia rātou e ngā ringa o te hunga i waiho iho hei kaitāwharau i a rātou.

4. I pōhēhē te Hāhi Katorika me ngā ringa ngaio hauora i te haumarū ngā tamariki, ā, i te manaakitia rātou. Ko te āhua nei i ngākau kore te Kāwanatanga ki te aronga o te kura. I whakapae ngā mātua i runga i te mānukanuka me te pōhēhē, he whakahaere ako auaha a Marylands, ā, he pūkenga ngā parata ki te whakaako i ngā tamariki hauā. I tukuna ngā purapura ora e ngā pirihimana, e ngā kōti me ētahi atu whakahaere ā-pāpori ki te Tarati o Hebron, nā runga i tana hau mō te tautoko rangatahi, nā runga anō i te whakaponō ki a McGrath me tana rongonui i te hapori.

5. Ka mutu, i morimorihia i whakatuapekahia te hapori o Ōtautahi, ngā mātua, te kāwanatanga, ngā pūkenga hauora me ētahi atu ringa ngaio e te Rangapū. Kāore i tika te whāngaia ngā tamariki ki te mātauranga, ā, he nui ngā parata i te pāwhera, i te patu, ā, i te whakahapa kino nei i ngā matea o te hunga i noho i raro i tō rātou taurimatanga. I te nuinga o te wā kāore ngā purapura ora i whakaponotia i ngā wā i kōrerotia ngā mahi tūkinō. I kitea ngā mahi pāwhera ānō ko te 'hara' ā-whakaponō kua ko te 'hara' ā-taihara nei. I takahia rā e ngā pīhōpa, e ngā māngai me te Rangapū o roto mai i te whānuitanga o te Hāhi Katorika te ara e parepare ai te hau o ngā parata o te Rangapū i te wā i puta ngā whakapae tūkinō.

Te Kura o Marylands

6. I te tau 1954 i pōwhiritia te Rangapū e te Pīhopa o Ōtautahi ki te whakawhānui i āna whakahaere ki Ōtautahi, ā, ka tāpaetia ko ngā papanoho o Marylands. I whakaaetia e te Rangapū kātahi ka whakatūria te Kura o Marylands, he kura motuhake noho tara-ā-whare mō ngā tama hauā. I te wā i whakatūria ai te kura whakawehewehe i ngā tamariki i ō rātou whānau, i ō rātou hapori me ō rātou hoa, koinei ko te whakatinanatanga o te ariā ira pākaha me te āria tinana pakari i whaimōhio ai ngā kaupapa here ā-iwi o tēnei whenua.

7. Ko te ira pākahatanga he whakapono he tikanga ka whai kia whakapai ake i te kounga o te ira o te taupori tangata. Ko te tinana pakaritanga he whakapuakitanga o te ira pākahatanga, ā, he momo whakaititanga pāpori. Koia ko te whakaaro, ko te iroiro whakaaro rānei e ū ai te toihara e whakanui ana i te tinana pakari me te hinengaro pakari.

8. I tukuna e te Rangapū ngā parata e rima mai i Ahitereiria kia noho hei kaimahi i te kura. Ko te nuinga he kaiako wheako kore, ā, kāore hoki he pūkenga motuhake hei whakaako i ngā tamariki hauā. Mō muri ake ka whakatuakitia ngā parata e rima katoa nā runga i ngā tūkinotanga i te tau tuatahi i tū ai te kura. Tae rā anō ki ngā whāwhākitanga i tūkinotia ētahi tamariki ia te rā ia te rā.

9. Ko tā te tākuta hinengaro Michelle Mulvihill, he kaimahi ō mua mō te Rangapū i Ahitereiria, i te whakawātanga a te Kōmihana a te Karauna mō te Kura o Marylands: “I toro atu te Hāhi Katorika i Aotearoa ki ētahi rāwaho whakapono whakangungu-kore ki te whakaako i ngā tamariki i mate taurimatanga i Marylands. I karawhiu ēnei tāne i ō rātou mana ā-wairua, ā-tinana hoki, ka mutu, i whakatuanui, i whakakino i ngā ao o ngā tamariki, ka ākirihia ai.”

10. Pātata ki te kura o Marylands ko te whare whakapani o Hato Hōhepa, i whakahaerehia e tētahi whakahaere Katorika kē atu, ko ngā Tuahine o Nazareth. Ahakoa kāore te Kōmiti a te Karauna i kitea he taunaki o te tūkinotanga tamariki i raro i ngā taurimatanga a ngā Tuahine o Nāzareth, i rangona ngā taunakitanga o ngā purapura ora o te whare whakapani e mea ana ko rātou hoki tērā i tūkinotia rā e ngā parata o te Rangapū.

11. Ahakoa i tautoko te Kāwanatanga, tae atu rā ki ngā minita rīwhi o te Karauna, i te whakatūnga me te hoatu pūtea tautoko moroki ki te kura mō ngā tau 30 kāore tonu te taha aroturuki i te kura me ngā tamariki i eke ki te taumata e tika ana. I te wā i whāwhākina ngā tūkinotanga e ngā tamariki ki ngā pirihihana me ngā kaimahi pāpori, kāore tonu rātou i whakaponotia.

12. I whakaaetia e Marylands ngā tama nō ngā tōpito katoa o Aotearoa tae atu rā ki ngā tari kāwanatanga ā-rohe me te hunga kei a rātou ngā matea-ako me ngā matea ā-whanonga.

13. Kāore te Rangapū i whāwhāki mēnā rānei he hauā ngā tama, kāore hoki i whāwhāki i ō rātou nā iwi, kāore i tutuki te aromatawai i ō rātou matea. Mō te taha ki te whakatutuki i ngā haepapa a te kura kia pai te whāngaia o ngā tamariki o te kura ki te mātauranga, tino kore nei i pahawa. He rite tonu te tuku i ngā tamariki kia mahi i te whare horoi kākahu, i te kīhini me te papa i waho, tēnā i te ako i rō akomanga. I whakahapatia te taha ki te whakangungu i ngā mahi akoako a te tamaiti, i te nuinga o te wā.

14. Neke atu i te 118 ngā tama o te tōpūtanga 537 i kuraina ki te Kura o Marylands (kotahi i te rima) i whāwhāki i ngā mahi tūkinō nō rātou e noho ana i raro i te taurimatanga o te kura. Ko te kōrero a ngā purapura ora ki te Ketuketunga he rite tonu tā ngā parata mahi pāwhera, tītoitoi me te patu kino i ngā tama nohinohi nō rātou e noho ana i raro i tō rātou taurimatanga. I mate ngā tama ki te tītoitoi me te mahi ai-ā-waha ki ngā parata. Inā tō rātou taunga ki ngā tūkinotanga, ko ētahi tama i tūkinō i a rātou anō. He wā ōna he rua neke atu rānei ngā parata i pāwhera tamariki i te wā kotahi, i whakamahia rānei ngā tama kia pāwhera tētahi i tētahi, i mua i te aroaro o ngā parata. I ētahi wā i noho tūmatawhāiti ēnei mahi. I ētahi wā i mahia i mua i te aroaro o te marea hei whakawhiu hei whakawehi i ngā tamariki. I whakawehia, i patua kinotia ngā tamariki e ū ai rātou ki ngā hiahia o ngā parata, ā, ko tā rātou he noho i te mōniana kaha.

15. Āpiti atu ki ngā tūkinotanga ā-tinana, ko tā ngā parata he tūkinō i ngā whakapono me ngā whakaaronga a te Hāhi hei parepare i ngā whāwhākitanga, i te mea i wehi katoa ngā tama me ngā rangatahi ki ngā whakawhiunga a te Atua. Ko tā ētahi o ngā parata i whakahau ai ko te mahi pāwhera he momo pure ā-wairua, ka whakamahia te reo o tō rātou whakapono hei whakaparauhau i ā rātou mahi, i tūkinotia hoki ngā tama i roto i ā rātou whakahaere ā-hāhi. I whākina e tētahi o ngā purapura ora mō te pāwheratia ōna i runga i te tūāhu māpere. I kīia hoki tētahi: "Ki te pai ō whanonga, ka tae koe ki te toi o ngā rangi."

16. I te taenga mai o ngā parata ki Aotearoa (he kirirarau a Parata McGrath nō Niu Tīreni) kāore ō rātou mōhiotanga mō te ahurea o Aotearoa, Niu Tīreni kāore hoki ō rātou mātauranga mō te ao Māori, me ngā matea ā-ahurea o ētahi atu rōpū. Kāore te Hāhi Katorika me te Pīhōpa o Ōtautahi i whakatūturu i tā ngā mema o te Rangapū whakamana i te hāngaitanga mai o te Tiriti o Waitanga i te wā e taurima ana i ngā tamariki me ngā rangatahi Māori, ā, kāore hoki i taurimatia ngā tamariki ki tā te Tiriti o Waitangi i whakatakoto ai. He waiaro kaikiri, whakaparauhako tō ētahi o ngā parata ki ngā tauira Māori, ā, i whakatinanahia ērā waiaro, tae rā anō ki te whakamahinga o te kupu 'nika' ki ngā tama. I whakaparauhakotia ngā tikanga, ā, i tētahi wā i whakahāwinitia tō tētahi tamaiti Māori matakū ki te tūpāpaku mā te whakaatu i tētahi tūpāpaku ki a ia.

17. I waengapū i ngā mahi tūkinō ā-tinana he ao whakamataku, he ao whakapōnānā te noho i te kura o Marylands. I te kitenga atu o ngā mahi tūkinō, ko te whakapae a ētahi, i mate pea ētahi tama nā runga i ngā tūkinotanga ki a rātou. Tē taea e rātou te kaupare atu i ngā pāwheratanga me ngā mahi āhuatanga karihika. I kōrero ētahi tama mō te whakamōmori. Kāore he putanga. I noho taratahi ngā tama, ā, kāore i whakapopotia ō rātou whakapae. I karapotia rātou e te tūkinō.

Te Tarati o Hebron

18. Whai muri i te wehenga o te Rangapū i a Marylands i te tau 1984, i pōwhiritia e te Pīhōpa o Ōtautahi ngā parata kia whakatūria he manatū tautoko i ngā rangatahi whakamōrearea, te nuinga he Māori.

19. I whakatauria ōkawatia e te Kāwanatanga he wāhi pai te Tarati o Hebron hei whakataurima i te rangatahi mā te whakaae ki tana rēhitatanga hei ratonga mō te Kāwanangātanga i te tau 1990.

20. I whakaritea e te Rangapū he kāinga taupua mā te rangatahi i roto i ngā whakahaere a te Tarati o Hebron. Ko parata McGrath tētahi o ngā kaipāwhera kino rawa atu, ka mutu, ko ia me tana kotahi te kaiwhakahaere matua. I whakamahia e ia tana tūranga ki Marylands hei pāwhera, hei tūkinō i ngā tamariki maha. I haere tonu āna tūkinotanga tamariki i te Tarati o Hebron, ā, i kino kē atu te āhua o ana tūkinotanga me te nui hoki o te hunga i tūkinotia e ia.

21. I āhei a parata McGrath te toro i ngā wāhi katoa o te hapori o Ōtautahi, kāore hoki ia pātaihia, i mātaihia. Ko tāna he aro ki te rangatahi, ā, i aropū ki te Māori. Ko te mea kino kē, ahakoa i mōhio ngā māngai o te Rangapū mō ngā whāwhāki hara tūkinō mōna i Marylands, kāore tonu i ketuketū i ngā whāwhākitanga. Nā konei i āhei a Parata McGrath te haere tonu me wāna mahi whakatuātea ki Hebron.

22. Ka kore pea e mōhiohia te whānuitanga ake o ngā mahi tūkinō a Parata McGrath. E mōhiohia ana e 28 ngā tangata, ko te nuinga he rangatahi ake i te 18 ngā tau, me tētahi kaimahi i whāki atu ki te Rangapū mō ngā tūkinotanga ki a rātou nō rātou e noho ana i te taurimatanga o te Tarati i raro i a Parata McGrath. Tokomaha rātou he kāinga kore, ā, i whakaurua atu i raro i ngā whakahaere ratonga pāpori me te pūnaha ture taihara. Kei taumata kē atu te kino rihariha o ngā momo tūkinotanga me te nui o ngā pāpurenga o te Tarati i tūkinotia i ngā ringaringa o McGrath, ko ngā takakinotanga ka mau tonu i roto i ngā purapura ora.

Ngā mate takakino

23. He nui ngā mate o ngā tūkinotanga (tūkinō, ūtonga, whakahapa) ki ngā tama i te Kura o Marylands, i te Tarati o Hebron me te whare whakapani o Hato Hōhepa. Ko ētahi i huri hei tangata kaikōka, ā, i whakapuaki i ētahi whanonga karihika, tikanga-kore. Ko ngā mate mauroa ko te mamae ā-tinana nā runga i ngā mahi tūkinō ki a rātou. Tōna hautoru o ngā purapura ora i uia i tahuri ki ngā wara whakapōauau me te waipiro hei whakamauru ake i ō rātou mamae, i pērā ētahi nō rātou e noho tonu ana i te kura, ā, i te nuinga o te wā ko tēnei te ara ki ngā mahi taihara me te uru ki ngā kēnge. I kōrero mai ngā Purapura ora mō ō rātou mate hinengaro, ngā mate hauora ā-tinana me ngā pōnānātanga ā-taera.

24. Nā runga i ngā mahi tūkinō i ngaro haere tō rātou whakapono me tō rātou whakapono ki te hāhi, me te aha, i uaua kē atu te taha whakawhanaungatanga ki ngā hoa, ki ngā tamariki me ō rātou hoa wahine/hoa tāne. Mūhore rawa atu ana ngā kōwhiringa mahi i te korenga o rātou i whai mātauranga, ā, ko te nuinga o ngā purapura ora i whai mahi poroteke, iti te utu.

25. He nui te hunga i kī mai ki a mātou i whai whakaaro, i ngana rānei rātou ki te whakamōmori. Ko te pōuri nui, he nui te hunga i mate pēnei na.

Ngā nawe me ngā kawenga

26. Mai i te mutunga o ngā tau 1970 tae atu rā ki ngā tau 2000, i whākina ngā tini whakapae mō ngā parata ki ngā māngai o te Rangapū.

27. He nui ngā tamariki i whāwhāki i ngā tūkinotanga tae atu rā ki ngā parata o te Rangapū, ngā māngai o te Rangapū, ngā kaimahi pāpori me ngā pirihihana. I te nuinga o te wā kāore ngā tamariki i whakaponotia, ka mutu, i whakatitongia ō rātou wheako. Kāore rātou i whakaponotia nā te mea he hauā kē. I ngā kēhi katoa, kāore rawa te rangapū i whakautu i ēnei whāwhākitanga.

28. I te tau 1977 i whakatuturia tētahi nawe muna mō ngā mahi tūkino a ngā parata Moloney rāua ko McGrath ki te Rangapū ā-rohe ki Poihākena. Heoi anō, i te mutunga o tērā tau i whakatinanahia e te Rangapū tana 'rongoā ā-matawhenua. I whakawhiti atu a Moloney ki ngā whakahaere a te Rangapū ki te Whatikana, ki Itaria. I whahokia a McGrath ki Kendall Grange, te whakahaere mā ngā tamariki hauā ki Ahitereiria. Ki reira ka haere tonu ia me wāna mahi tūkino tae atu ki te wā i hoki a ia ki te Ōtautahi, nāwai rā ka whakatūria e ia te Tarati o Hebron.

29. E 21 i te 37 ngā parata i hāmenetia, katoa i noho hei minita i te hapori o Ōtautahi i te wā i whakahaerehia a Marylands e te Rangapū. Tekau mā iwa ngā parata i hāmenetia mō ā rātou mahi pāwhera tamariki.

30. Mō te roanga o ngā tau 28 i whakahaerehia a Marylands, i te nuinga o te wā e whitu ngā parata i te wā kotahi ka noho ki te hapori o Ōtautahi, tokorima rātou i whakapaetia he kaihara tūkino, ā tokowhā i te rima i whakapaetia he kaipāwhera. E ai ki ngā tataunga, he roa ake te noho a ngā kaihara ki Marylands tēnā i te hunga hara kore.

31. E rua ngā ketuketunga a ngā Pirihimana, tekau tau nei te wehenga o tētahi ki tētahi, engari i whakaepaepatia nā te korenga o ngā parata o te Rangapū i whai i ngā tikanga o te ketuketunga. He nui ngā whakapaunga pūtea a te Rangapū ki Ahitereiria mō ngā nama ture hei kaupare atu i te whakahokinga o ngā parata e toru neke atu kia whakawātia rātou ki Aotearoa Niu Tirenī. I te mutunga iho, i hoki ngā parata ki Aotearoa, Niu Tirenī.

32. I te tau 1993, i whakawhiua a Parata McGrath i Ōtautahi mō ngā tau e toru, ka tukuna ki te whareherehere mō ngā hāmenetanga 10, nā runga i ana tūkinotanga ki ngā tamariki me ngā rangatahi i waenganui i te 8 tau te pakeke me te 16 tau te pakeke. Engari ka tae rawa ki te tau 2006 kātahi anō a parata Garchow me parata Moloney ka hoki ki Aotearoa Niu Tirenī ki te whakakanohi i ā rāua hara ki te taha o Parata McGrath rāua ko Parata IU.

33. I hoki a Parata Moloney ki te hapori o Ōtautahi i ngā tau 1980, koia te tūmuaki o te Kura o Marylands i ngā tau 1970, ā i whakawhiua ia i Ōtautahi i te tau 2008 mō ngā hāmene e whitu, tokorima ngā kai whakatakoto nawe, ā i tukuna ia ki te whare herehere mō āna hara mō te rua tau me ngā marama e iwa. I whakawāteahia ia i te whareherehere i te marama o Hepetema i te tau 2009 ā i hoki a ia ki Ahitereiria. Ko te kōrero a te Rangapū ki te hunga pāpāho "He mema tonu a Parata Moloney o te Rangapū, me te aha, ka whai wāhi ia ki te Rangapū i Ahitereiria." I mate ia i te tau 2019 ki Poihākena.

34. Kāore i whakatutukihia ngā whakawā o Parata Garchow me Parata IU. I te marama o Hūrae i te tau 2008 i whakaurua he tono kia whakawāteahia ngā hāmene nā te māuiui o ngā purapura ora me Garchow hoki. I mate ia te marama o Maehe i te tau 2011. Hei tā te titiro a ngā pirihimana i ngana a Parata IU ki te whakahahani i ngā whāwhākitanga nā roto mai i tana tono kia whakamātauria ā-hinengaro ngā kai whāwhāki. Nā te takaroa o te wā me te nui o te mana o te kēhi ka whakaaetia tā Parata IU tono kia whakawāteahia ngā hāmene nā runga anō hoki i ngā ture me ngā tikanga whakawā, i te rā i whakaritea kia tīmata ai ngā mahi whakawā.

35. I te tau 2006 i whakawhiua a Parata McGrath i Aotearoa mō ngā hāmene e 22 e hāngai ana ki āna mahi i Marylands “kia māunutia me ngā mahi tūkinō ki ngā tama o raro iho i te tau tekau mā ono”. Ko ngā hara pāwhera ko te rāwekeweke, ko te whāwhā, ko te tītoi me te ai-ā-waha engari i whakatauria e te kōti kāore ōna hara pāwhera tou. I whakawhiua ia mō te rima tau ki rō whare herehere. Ko ngā kōrero a te kaiwhakawā whakatau whakawhiu, ko ngā “pūrongo pānga pāpurenga ... i kōrero mō te riri, te mataku, te āmaimai, ngā moepapa, te kiritau ngoikore, te kohuki taumuri, ā, ngā raru nunui i te takanga o te wā.” I whakawāteahia a Parata McGrath i te whare herehere i te tau 2008.

36. I te tau 2018, i whakawhiua a Parata McGrath i Ahitereiria ā tukuna atu ana ia ki te whare herehere mō te 33 tau hei utu i ngā hara tūkinō e 64 ki ngā tama 12 i Kendall Grange, i tūkinotia rātou mō te roanga o ngā tau e whitu. I te tau 2019 i whakawhiua ia ki te whare herehere mō ngā tau 29 atu anō mō ngā taihara ki ētahi atu tama i Kendall Grange boys, 15 rātou. Ko ētahi o ngā whakawhiunga he utu i tana mahi pāwhera tou.

37. Hei whakatōpūtanga ake, i whakawhiua a Parata McGrath i ngā kēhi e rima, e rua ki Aotearoa Niu Tirenī e toru ki Ahitereiria, mō ngā hara 1,000 neke atu, i te roanga ake o te 30 tau. Ko te āhua nei ka noho ia ki tētahi whare herehere ki Ahitereiria mō te roanga ake o tana oranga.

38. I tāmia ngā purapura ora e ngā ketuketunga a ngā pirihihana me ngā tukanga a te kōti. I whakataha ake ētahi taunakitanga nā runga i ngā hauātanga o ngā purapura ora, i kīia ā rātou kōrero he hārakiraki he kōrero parau noa. Kāore ngā pirihihana i tuhia ngā raraunga mō te āhua ki ngā purapura ora me ō rātou hauātanga, kāore hoki ngā ringa ngaio i karangahia hei āwhina i te taha ki te whakawhitihiti kōrero me te ārahi i te hunga hauā ki te whakapuaki i ō rātou na nawe. Kāore hoki i tika tā ngā pirihihana kawē i ā rātou ketuketunga e pai ai te whakawhitihiti kōrero ki ngā Māori me ngā iwi o Te Moana nui a Kiwa.

39. I whakaaetia e ngā pirihihana o Aotearoa ka uaua te tukanga whakawā mā te hunga hauā nā te mea ko te mārama ki ngā kōrero, ko te āhei ki te uiui me te mārama ki ngā tukanga pīroiroi o te kōti te tūāpapa mō ngā whakawātanga taihara, ka mutu he tere te karawhiu o ngā whakahaere. Kāore i tika te pūnaha mō ngā pāpurenga o ngā hara pāwhera, ahakoa he hauā, kāore rānei.

40. I kīia mātou e ngā purapura ora me ō rātou whānau kāore te tukanga whakaea taihara i whai whakaaro mō ngā hauātanga o ngā pāpurenga, kāore hoki i whāia tētahi kaitiaki hei āwhina i a rātou i a rātou e whakatakoto ana i ō rātou taunakitanga. Waihoki i kī mai rātou kāore te tukanga whakaea taihara i whai whakaaro ki ō rātou hauātanga i roto i ngā uiuinga ā i wawe tā te kōti whakakāore i ō rātou taunakitanga, kāore rawa i tautokona, i runga i te tika.

41. Ahakoa ka taka ngā whakahaere mō te kawenga taihara ki roto i ngā whakahaere a ngā pirihihana, kāore hoki i whai whakaaro mēnā rānei ka riro mā te Rangapū, mā ōna māngai matua rānei ēnei taihata e kawē.

42. I whakahaerehia e te Pīhopa o Ōtautahi te noho a te Rangapū ki Aotearoa Niu Tirenī, ā i runga anō i ngā kawenga, i hē tana whakahaere tikanga me te aromatawai i ngā whakahaere ki Marylands me Hebron. Waihoki, i te putanga tūmatawhānuihia o ngā ripoata mō ngā tūkinotanga i te tau 2002, kāore a Pīhopa Cunnen i whakatutuki i ōna kawenga mō ngā whakahaere tikanga a te Rangapū. Engari kē ka whakapuaki i tana matangurunguru ki ngā pāhotanga a te hunga pāpāho a i puta he kōrero i a ia hei kaupare i ngā hau kino ka pā ki te hāhi.

Te takahi pea i ngā kawenga tikanga tangata

43. E ai ki ngā taunakitanga, i takahia pea e te Karauna ngā kawenga mōtika tangata mō te hunga i noho i raro i ngā taurimatanga o te Kura o Marylands me te Tarati o Hebron. Kei reira hoki pea ētahi pātai e pā ana ki te kawenga o te Rangapū o Hato Hoani o te Atua me ngā mema o te Rangapū mō te tūkinotia o te hunga i whai wāhi atu ki ngā ratonga o te Tarati o Hebron. Ka pupū ake pea te kawenga i raro i Te Pire Mōtika o Aotearoa mō ngā mahi i mahia whai muri i te whakatūnga o te Pire Mōtika i te 25 o Hepetema 1990.

44. Kāore e kore kei reira ngā taero mō te kaitono ahakoa ko wai, ā ehara i te mea mā te Ketuketunga/Uiuinga e tohu i te kawenga, ehara hoki mā mātou, i raro i te Ture Ketuketunga 2013. He take tērā mā te kōti me ētahi atu hunga whai pānga e tika ana. Heoi anō ā mātou whakatau he whakaara ake i ngā pātai mō te kawenga, tae atu rā ki ngā mahi tūkinō me ētahi atu wāwāhinga mōtika tangata. Ka whakatakotoria e mātou ētahi tohutohu i roto i te rīpoata whakamutunga hei whakakite i ngā kawenga a te Karauna, te Rangapū me te hunga whai pānga.

45. Taro ake nei, ko tā mātou he akiaki i te Karauna me te Rangapū kia takahia rā e rātou te ara e tika ai te mātāhira o ō rātou kawenga i roto i ngā tūāhuatanga o tēnei ketuketunga. Ka mutu, ko tā mātou he kōkiri i ngā mahi e riro ai te manatika ki ngā pāpurenga me ngā purapura ora o te Kura o Marylands me te Tarati o Hebron.

46. Me whai e tātou te ara e whakahokia ai te mana tangata, e ea ai ngā mamaetanga. Mēnā tātou e whai nei kia kaua rā ā tātou tamariki ā tātou rangatahi e tūkinotia e whakahāwinitia anōtia, me panoni rawa te pūtake o ngā pūnaha i takea mai ai ērā hara. Mā ērā panonitanga ka hāpai ake i a Aotearoa Niu Tirenī kia ngākau tapatahi te noho i te pāpori, kia tū kaha rā te whānau, kia ora, kia haumarū, kia whakautea ai.

Te Tiriti o Waitangi

47. Kāore i tika tā te Kāwanatanga, tā te Hāhi Katorika me te Rangapū whakataurima e ai ki ngā mātāpono o te Tiriti o Waitangi.

48. Ko tā te ariā ā-ture o te Tiriti he whakamana i ngā herenga ka whānui kē atu i te hunga ka whai pānga ki te Tiriti, ā, he aro pū ki ngā tamariki Māori mēnā kei te noho rātou i raro i ngā taurimatanga a te Kāwanatanga, kei roto rānei i ngā whakahaere ā-whakapono tae atu ki te Hāhi Katorika, he whanaungatanga tēnei nō maimai, nō te haingatanga o te Tiriti o Waitangi.

Tā mātou kite ai

49. 42 ā mātou whakatau i tō mātou kēhi. Ka whakawhāriki i ngā hanepītanga o te Hāhi Katorika, te Rangapū me te Kāwanatanga.

50. Hei whakarāpopoto ake, nā te Kāwanatanga te kura o Marylands i rēhita i tautoko ā-pūtea. Kāore i tika tā tērā kura whāngai i te mātauranga me te tiaki tamariki i tukuna ki reira. I tūkinotia, i whakahapatia ā i takahia rā ō rātou mōtika tangata. I rēhita te Kāwanatanga i te Tarati o Hebron, ā, i tukuna ngā tamariki whakamōrearea ki reira e ngā ratonga a te Kāwanatanga, kāore i whai whakaaro ki te taha manaaki, tiaki i a rātou. Kāore hoki te Kāwanatanga/Karauna i whakatutuki i te haepapa o te manaaki tamariki i Marylands me Hebron, e hāngai pū ai ki ngā mātāpono o te Tiriti o Waitanga, kāore hoki he kawenga tika mō ngā tūkinotanga i whakatinanahia ai e te Rangapū.

51. I whakatūria te kura o Marylands me te Tarati o Hebron e te Hāhi Katorika me te Rangapū kia whai hua ai ērā whakahaere e rua engari kāore rawa rātou i manaaki i tiaki i ngā tamariki, i ngā rangatahi i raro i tō rātou taurimatanga, kāore hoki i tautokona tō rātou ako, tō rātou mārama hoki ki te ao Māori. Nā ngā parata i kino rawa atu ai te tūkinotanga o ēnei tamariki, o ēnei rangatahi, ka mutu i kaha tā rātou kaupare i ngā whāwhākitanga, kāore hoki i tautokona ngā purapura ora me ō rātou whānau, e ea ai ō rātou mamaetanga i runga i te tika.

52. Kāore te rangapū i haere ki te rapu i ngā purapura ora i noho i raro i ngā whakahaere a te Tarati o Hebron ki te hāpai i a rātou ki te whati puretumu torowhānui. Kāore hoki te Hāhi Katorika, te Rangapū me ngā pīhopa whakapiki tūranga me ngā ratonga a te Hāhi Katorika i haere ki te rapu i ngā purapura ora i kuraina ki Marylands me te Tarati o Hebron. Kāore anō hoki te Hāhi Katorika me te Rangapū kia kōkiri i tētahi paku ketuketunga/uiuinga e mōhio ai te kino me te whānui o ngā tūkinotanga ki Marylands.

53. Ko tā te ketuketunga nei he whakawhāriki i ngā take i whakawhiua ai ngā kaihora o te Rangapū mō ngā hara itiiti noa nei ahakoa rā te nunui me te whānui o ngā hara i huraina rā e ngā purapura ora me ō rātou whānau. Heoi anō ehara tēnei i te pakiwaitara e pā ana ki ngā 'hua kino'. Ko tā te ketuketunga nei he aro ki te Hāhi Katorika, te Rangapū me te Kāwanatanga, Ko tā rātou he kawae ake i ngā hara mō ngā tūkinotanga i taka ki runga ki ngā tamariki maha. He nui ngā mate i pā kino nei i ō rātou ao, i ō rātou whānau me ō rātou kaitautoko nā runga i ngā pūnaha a te Hāhi Katorika me te Kāwanatanga mutunga mai o te whamamā, nā rātou ngā tataui i whakatūwhera hei aheinga mō ngā mahi tūkinotanga tamariki ā i kauparetia atu ngā whāwhākitanga.

54. Kāore anō kia whakawhiua te Hāhi Katorika, te Rangapū me te Kāwanatanga mō te nui whakarahara o ngā tūkinotanga i puta i te kura o marylands me te Tarati o Hebron, kāore hoki rātou i whakautu i ngā nawe mō ā rātou mahi mutunga mai o te whakarihariha. Ki te kore he kawenga, ka pēhea tātou e ū ai ki te whakaaro ka kore a muri e hokia. Ko tā mātou i kite ai, ana kia hoki anō ki tā mātou i taunakitia ai i te rīpoata o Tīhema 2021, me noho ko te puretumu torowhānui hei tūāpapa hei pūnaha mō ngā whakahaere ā-Kāwanatanga ā-whakapono nei hoki.

55. Ko ngā whakakitenga i tēnei ketuketunga he whakaara mai hoki i ngā take pūnaha toro whānui e kaha kitea ana e kaha rangona ana i ēnei rā, ā ka whakawhārikihia ki roto ki tā mātou Rīpoata Whakamutunga me ngā taunaki mō te panonitanga.

56. Me hiwa rā a Aotearoa Niu Tirenī ki te karanga o te whakaea hara e hoki anō ai te manatika ki te tangata. Me panoni i te pūtake o aua whakahaere e kore anō ai te tūkinotanga, te mamae, te hahani e pā ki ā tātou tamariki, ki a tātou rangatahi.

